

清·方略館 編

清代 方略 全書

北京圖書館出版社



清代方略全書

一四九

清·方略館編

北京圖書館出版社

清·奕訢等撰

欽定剿平捻匪方略

卷八二——九二

清同治十一年（一八七二）鉛印本

欽定剿平捻匪方略卷八十二

庚申年

七月初三日

乙未

傳振邦奏言歸德廟地方距袁

圩僅五六里該逆橫紮數營與我軍對壘拌死

抵拒臣正擬親督兵練一鼓埽蕩詎當暑雨時

行累月不止宿境西南尤數十里一片汪洋各

營均在水鄉轉運不通樵蘇斷絕軍士以餅餌

充飢雖風雨泥水中毫無懈志賊圩被水尤甚

食盡技窮六月初五六等日屢乘夜雨大作梟
水來擾冀圖鋌而走險總兵博崇武知府童維
翰等帶兵追勦奪毀賊壘二座擒斬二百餘人
同時童亭之賊順流紮筏直撲沿澮大營經臣
會同田在田隨時督兵開礮擊沈其筏自是水
勢益大賊亦不敢復出永境迤南捻首李加膺
李大個孫冲等所踞岳集等圩被水淹沒難以

藏身又因我軍進攻萬分驚懼因趁雨勢急時
全股北遁至居家集等處盤踞窺伺北路大營
臣聞信當飭陳圩一軍仍回蒙村苗村等營與
蕭碭永諸縣一體聯絡加意防範十三日賊馬
數十匹淌水至苗村營西經該營出隊迎擊賊
卽回奔十六日兩營齊出全隊挑練隨行向大
回村一帶迎剿賊等望風遠颺全行回巢連日

天稍放晴兵勇略可執爨小舟運糧亦可直達
營濠臣分飭帶隊員弁整頓隊伍擬將遣回各
練陸續調齊仍舊兩路齊進十八日據報北路
竄賊經袁圩外援各匪分股勾結復向碭山一
路北竄現在大水瀰漫賊中久已乏食伺隙出
掠本在意中且毫匪來援被大軍屢挫其鋒傷
亡甚夥餘衆乏食久有歸志或恐偵知實情故

向西北竄逸俾我師移防北路再繞虞夏回亳
袁圩困賊亦得乘閒突出接應西遁亦未可知
臣與田在田等再四熟商南路功在垂成固不
可略事疏忽北路關繫緊要尤不可稍涉大意
幸關保已派兵千名來永防勦蕭境有蒙村等
營布置亦尙周密惟蕭碭交界黃家口一帶雖
經徐州鎮道派兵巡哨兵力尙單該處爲徐郡

門戶豐沛兩縣與東直各處邊疆皆資屏蔽因
抽撥馬步隊益以留徐兵勇交署徐州鎮總兵
李恆清就近帶赴黃家口一帶駐紮卽將蒙村
苗村等營併歸該總兵調遣俾蕭碭聯絡一氣
無隙可乘以專責成而固藩籬至郡城有吳棠
駐守卽有警急該總兵亦易於回顧儻北路賊
勢較重有兵勇三千餘名迎頭邀截再由臣親

聞

率勁旅飛往策應前後兜擊更易著手奏入報

初六日

戊戌

袁甲三奏言定城逆匪屢經懲創賊

膽愈寒亟宜乘勢並進力圖合圍六月十六日

飭副都統烏勒興阿等統帶馬隊總兵滕家勝

補用道張學醇知府張汝梅等統帶步兵兩路

直趨城下於東北西北一帶紮營八座十七日

添紮營盤九座距城均在一里內外西路副都
統薩薩布等先紮於竹城寺二十日自城西向
南搶築四營圍至西門以南該逆大股馬步出
城突撲烏勒興阿薩薩布張汝梅等帶兵截擊
斃賊約三四百人知府袁懷忠衝陣墜馬經兵
勇扶救而起張學醇亦身受槍傷裹創力戰副
將阿克敦復從旁抄擊賊勢披靡退敗入城二

十一日賊撲于昌麟馬昇平兩營于昌麟等奮力抵敵礮斃捻首尹老玉參將王致祥等各帶所部援應該逆日夜轉戰不肯稍卻于昌麟馬昇平因兵勇飢疲已極遂於二十三日乘夜衝出黑暗之中不辨路徑兵勇閒有傷亡于昌麟馬昇平尙無實在下落二十四日該逆大股馬步蠶擁而來我軍極力抵禦張得勝由西北攻

勦踏毀賊圩三座二十五日張龔兩逆復自率
大股由西門繞過河溝列仗於我營西北仍圖
搶築賊圩而於北門另出賊匪數百衝我橋日
營盤經遊擊宋慶縣丞李守潔等卽時擊回西
門一股亦爲馬隊壓退入城二十六日該逆又
出大股分撲穆騰阿營盤穆騰阿力疾督隊盡
力衝壓該逆退至沙澗山口紮營冀通道路維

時張得勝帶隊馳至立將賊營踏毀南路徐立壯一軍先擬拔隊北趨探知合肥定遠巢縣交界之雞鳴橋朱家集等處捻粵各逆分股來援定遠當派隊伍於十九日由吳村繞出賊後連踏賊營三座徐立壯親督大隊向東截擊至罔子城遇賊馬步數千人定遠之賊亦派隊出應我軍分路截殺共計斃賊一千餘名我軍旣偏

城爲壘該逆外援又屢經擊退城賊已無他望
現在徐立壯力扼廬巢來援之路附城南面尙
有一綫空隙臣等已催兵進紮長圍旣成似堅
城可望卽復奏入報

聞

初八日庚子慶廉奏言查張落刑龔得孫葵心王

懷義姜台凌劉狗等著名巨捻不下數十股每

股各有數萬人不等宿亳蒙懷廬壽一帶及豫
省邊界賊圩林立節經袁甲三勝保繪圖貼說
恭呈

御覽已邀

聖明洞鑒竊以捻逆臨張糾衆出竄動以萬計江東豫
三省屢遭蹂躪我兵路路扼防勢分則力單此
擊則彼竄以致屢經攻擊總未能痛加剿洗埽

大擒渠是以前年袁甲三有三路會剿之議旋
因粵逆捻逆勾結肆擾官軍應接不遑未能合
力並舉臣統籌全局欲清皖境賊氛必先堵扼
紛竄能嚴門戶鎖鑰乃可會合進攻豫省馬步
官兵臣到防點驗止有三千餘名此外皆係練
勇與關保兩營合計共得一萬數千人臣逐加
簡練擇其精壯得力者留之仍派前敵扼紮其